

Pergerakan Kesederhanaan Global Cetusan Najib Satu Langkah Berani Dan Mulia - SUHAKAM
Bernama
17 April , 2012

KUALA LUMPUR, 17 April (Bernama) -- Suruhanjaya Hak Asasi Kemanusiaan Malaysia (SUHAKAM) menyifatkan Pergerakan Kesederhanaan Global yang dicetus Perdana Menteri sebagai langkah berani dan mulia dalam penerapan nilai-nilai hak asasi manusia dengan membentuk asas toleransi dalam masyarakat pelbagai.

Pengerusi SUHAKAM Tan Sri Hasmy Agam berkata suruhanjaya itu percaya berdasarkan rekod pencapaian negara dalam bidang ekonomi, Malaysia mampu memperbaiki rekod hak asasi manusia bukan saja di dalam negara, bahkan dunia.

"Untuk Malaysia memainkan peranan utama atau pemangkin dalam gerakan global yang telah diramal ini, adalah amat penting untuk mempromosikan kesederhanaan di dalam negara dengan mengambil langkah-langkah perlu.

"(Ini) termasuk menggantikan undang-undang yang ketat kepada sederhana, bertamadun dan berperikemanusiaan, yang konsisten dengan nilai-nilai dan keperluan semasa," katanya dalam perutusan sempena Laporan Tahunan Suhakam 2011 di sini Isnin.

Diilhamkan Datuk Seri Najib Tun Razak, Persidangan Antarabangsa Pergerakan Kesederhanaan Global (ICGMM) yang julung kali diadakan di ibu negara pada 17 Jan lepas dihadiri 450 perwakilan dari lebih 70 negara bagi merumuskan rangka kerja untuk menggalakkan kewujudan bersama dalam hubungan antarabangsa, ekonomi, kewangan, pendidikan dan penyelesaian konflik.

Hasmy berkata dalam menjayakan usaha murni itu ia boleh dimulakan dengan penerimaan Deklarasi Hak Asasi Manusia Sejagat (UDHR) sebagai prinsip-prinsip sejagat yang perlu dicapai di samping mendukung hak asasi manusia berpandukan Perlembagaan Persekutuan.

Beliau percaya negara mampu mencapai tahap hak asasi manusia yang lebih tinggi dan menjadi contoh kepada negara-negara lain.

Berdasarkan laporan tahun 2011 Suruhanjaya itu, Hasmy mengakui beberapa kemajuan dalam hak asasi manusia telah dicapai negara, namun rekod peningkatannya agak perlahan dan tidak konsisten.

Beliau berkata antara perkembangan positif ialah keputusan Perdana Menteri memansuhkan Akta Keselamatan Dalam Negeri (ISA) 1960, Akta Buang Negeri 1959, Akta Kediaman Terhad 1933, Perisytiharan Darurat dan Kajian Semula Akta Mesin Cetak dan Penerbitan 1984, dan Akta Polis 1967.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=659517>